

四庫全書

子部

欽定四庫全書

冊府元龜卷六百四十二 宋王欽若等撰

貢舉部

條制第四

後唐明宗長興元年二月勅傳科不精公穀虛有其名  
禮科未達周儀如何登第兼知前後空聞定制去留皆  
在終場博通者混雜以進身膚淺者僥求而望事須頒  
明勅俾叶公途自此後貢院應試三傳三禮宜令准進

士九經五經明經例逐場皆湏去留不得候終場方定  
仍具所通否粗一一旋於榜內告示其學究不在念書  
可特示墨義三十道亦准上指揮如此則人知激勸事  
有區分主司免致於繁忙舉子不興於僭濫仍所司學  
究不念書新例也國朝所設五科唯學究文書最少乃  
令念其經而通其義故曰學究今祇許對義即學者皆  
專於此科時論非之

五月勅宏詞拔萃明筭道舉百篇等科並宜停廢

六月中書門下奏勅新及第進士所試新文委中書門下細覽詳覆方具奏聞不得輒徇人情有墮事體中書於今年四月二十九日帖貢院准元勅指揮中書量重具詳覆者李飛賦內三處犯韻李穀一處犯韻兼詩內錯書青字為清字並以詞翰可嘉望特恕此誤今後舉人詞賦屬對並須要切或有犯韻及諸雜違格不得放及第仍望付翰林別撰律詩賦各一首具體式一一曉示將來舉人合作者即與及第其李飛樊吉夏侯珙吳

油王德柔李穀等六人盧價賦內薄伐字合使平聲字  
今使仄聲字犯格孫澄賦內御字韻使字字已落韻又  
使齊字是上聲有字韻中押售字是去聲又有朽字犯  
韻詩內田字犯韻李象賦內一句六石慶芳並合使此  
奚字道之以禮合使此導字及錯下事嘗字韻內使方  
字詩中言十十十字處合使平聲字偏字犯韻揚文龜  
賦內均字韻內使民字以君上為駢駢之士失奉上之  
體兼善字是上聲合押徧字是去聲如字內使輿字詩

中徧字犯韻師均賦內仁字犯韻晏如書晏如又河清  
海晏晏字不合韻又無理晏字即落韻楊仁遠賦內賞  
罰字書伐字銜勤字書鍼字詩內蓮蒲字合着平聲字  
兼黍梁不律王谷賦內御字韻押處字上聲則落韻去  
聲則失理善字韻內使顯字犯韻如字韻押殊字落韻  
其盧價等七人望許令將來就試仍放再取文解高策  
賦內於字韻內使依字疑其海外音訛文意稍可望特  
恕此其鄭朴賦內言肱股詩中十十字犯韻又言玉珠

其鄭朴許令將來就試亦放取解仍自此賓貢每年祇放一人仍須事藝精奇張文寶試士不得精當望罰一季俸今後知舉官如敢因循當行嚴典伏以國設高科人貪上第所望不小其業須精實以喪亂年多苦辛人少半失宣尼之道倍勞宗伯之心不望超羣且須合格今逢聖運大闡皇猷設官共革於時訛選士實期於歲勝又朝廷較藝為擇賢或臣下收恩豈成公道時論以貢舉官為丘門恩門及以登第為門生門生者門弟子

也顏閔游夏等並受仲尼之訓即是師門大朝所命春  
官不曾教誨舉子舉子是國家貢士非宗伯門徒况又  
斥先聖之名失為儒之體今後及第人放榜時並須據  
才藝高低從上依次第安排不得以隻科取鼎島岳斗  
之名為貴莫從敦實以息浮澆兼不得呼春官為恩門  
師門不得自稱門生除賜宴外不得輒有率斂別謀歡  
會曾赴舉落第人無故不得改名將來舉人並依據地  
理遠近於十月三旬下納文解如違不在收受之限勅



金史卷之六十二  
卷六百四十二  
旨從之

七月比部員外郎知制誥崔稅奏臣伏見開元五年勅  
每年貢舉人見訖宜令引就國子監謁先師學官為之  
開講質疑所司設食永為常式自經多故其禮浸停請  
舉舊典從之

八月勅其童子准往例委諸道表薦不得解送無所司  
每年所放不得過十人仍所念書並須是部帙正經不  
得以諸雜零碎文書虛成卷數兼及第後十一選集第

一任未得授親人官

是月勅今後吏部所應宏詞拔萃宜並權停其貢院據見應進士九經五經明經並五科童子名外其餘諸色科名亦宜並停

十二月每年貢舉人所試詩賦多不依體式中書奏請下翰林院命學士撰詩賦各一首下貢院以為舉人模範式學士院奏伏以體物緣情文士各推其工拙掄材校藝詞場素有其規程凡務策名合遵常式况聖君御宇

與學盈朝儻令明示其規模或慮衆貽其臧否歷代作者垂範相傳將期絕彼微瑕未若舉其舊制伏乞下所司依詩格賦樞考試進士庶令職分互展恪勤從之

二年二月禮部貢院奏當司奉堂帖夜試進士有何條格者勅旨秋來赴舉備有常程夜後為文曾無舊制王道以明規是設公事須白晝顯行冀盛觀光猶敦勸善每取翰林學士往例皆試五題共觀筆下搗詞不俟燭前構思其進士並令排門齊入就試至門開時試畢內

有先了者上歷晝時旋令先出其入策亦須晝試應諸科對策並依此例餘准前後勅格處分夜試進士非前例也

六月刑部員外郎和凝奏臣竊見明法一科久無人應今應令請減其選限必當漸舉人謹按考課令諸明法試律令十條以識達義理問無疑滯者為通所貴懸科待士自勤講學之功為官擇人終免曠遺之咎况當明代宜舉此科勅旨宜升明法一科同開元禮選數兼赴

舉之時委貢院別奏請會刑法試官依格例考試

先是天成

三年十一月權判大理寺蕭希甫上言曰臣聞禁暴亂者莫先於刑律勤禮義者無切於詩書刑律明則人不敢為非禮義行則時自然無事今詩書之教則業必有官刑律之科則世皆莫曉近者大理正宋昇請置律學生徒雖獲上聞未蒙申舉伏乞時頒詔旨下付國庠令再設此科許其歲貢仍委諸州各薦送一兩人就京習學候至業成便放出身無許以卑官却還本處則率土之內盡會刑書免誤觸於金科與咸遵於皇化至是凝

復奏請

三年正月詔曰貢舉之人辛勤頗甚每年隨計終日食貧須寬獎勸之門俾釋羈縻之歎今後落第舉人所司

已納家狀者次年便付所司就試並免再取文解兼下  
納文解之時不在拘以三旬但十月內到者並與收受  
十二月禮部貢院奏准會要長壽二年七月十日左拾  
遺劉承慶上疏曰伏見比年已來天下諸州所貢方物  
至元日皆陳在御前惟貢人獨於朝堂列拜伏請貢人  
至元日列在方物之前以備充廷之禮制曰可近年直  
至臨鑠院前赴應天門外朝見今後請令舉人復赴正  
仗仍緣今歲已晚貢士未齊欲且據見到人點引牒送

四方館至元日請令通事舍人一員引押朝賀列在貢物之前或以人數不少即請祇取諸科解頭一人就列其餘續到者候齊日別令朝見如蒙允許當司即於都省點別習儀奉勅宜准元勅處分餘宜依

四年二月知貢舉和凝奏舉人就試日請皇城司差人於院門前聽察舉人挾帶文書入院請殿將來舉數自一舉至三舉放榜後及第人看榜訖便綴行於五鳳樓前謝恩後赴國學謝先師舊例侵星張榜訖貢舉考試

官便出院蓋恐人榜下誼訴今年請放榜後貢舉官已下至晚出勅旨五鳳樓前非舉子謝恩之所令於朝堂謝訖即赴國學試日宜令御史臺差人院司聽察放榜日至晚出院此後永為定制餘並依奏

是月禮部貢院奏新立條件一九經五經明經呈帖經之時試官書通不後有不及格者唱落後請置筆硯將所納由分明却令自看或是試官錯書通不當與改正如懷疑者使許請本經書面前檢對如實是錯誤即更



於帖上書名而退一五科常年駁榜出多稱屈塞今年並明書所對經書墨義云第幾道不第幾道粗第幾道通任將本經書疏照證如考試官錯書不粗請別將狀陳訴當再加考校如實錯誤妄陳文狀當行嚴斷一今年舉人有抱屈落第者許將狀披訴貢院當與重試如貢院不理即詣御史臺論訴請自試舉人日令御史臺差人受舉人訴屈文狀并引本身勘問所論事件或知貢舉官及考試官已下取受貨賂昇擢親情屈塞藝能

應副囑託及不依格去留一事有違請行朝典一懷挾  
書策舊例禁止請自今年後入省門搜得文書者不計  
多少准例扶出殿將來一舉上鋪後搜得文書者准例  
扶出殿將來兩舉一遙口授人迴授試處及抄義題帖  
書時諸般相救准例扶出請殿將來三舉一自是藝業  
未精准格落下出外及見駁榜後羞見同人妄扇屈聲  
擬為將來基址及別人帖對過場數多者便生誣玷墜  
陷或羅織毆罵者並當收禁榜送御史臺請賜勘窮如

知貢舉官及考試官事涉徇私屈塞藝士請行朝典若虛妄者請痛行科斷牒送本道重處色役仍永不得入舉場同保人亦請連坐各殿三舉奉勅宜依

三月童子閻惟一等三十九人進狀伏見貢院榜童子祇放十人乞念苦辛更加人數勅旨都收二十人須是實苦辛者仍此後不得援

末帝清泰元年九月中書門下帖太常以長興三年勅諸科舉人常年薦送先令行鄉飲酒之禮凡預舉人列

從鄉賦遂奏鹿鳴之什俾騰龍化之津雅音既動於笙  
簧厚禮復陳於筐筥行茲盛事克振儒風宜令復行鄉  
飲酒之禮太常草定儀注頒下諸州預前肄習解送舉  
人之時便行此禮其儀速具聞奏時李憚為太常文士  
淺於禮學唯博士段顥據禮記賓主次第申初長興中  
宰臣李愚好古奏行此禮累年不暇至是愚復舉奏及  
觀禮官所定無緒禮直官孫知訓以為古禮無次序不  
可施行博士或言於愚曰梁朝時青州魯行一度遂令

青州訪舊簿書以聞

二年七月御史中丞盧損言天成二年二月勅每年進士合有聞喜宴春闕宴并有司所出春闕牒用綾紙並官給臣等以舉人既成名第宴席所費屬私况國用未充枉有勞費請依舊制不賜詔曰春闕冬集綾紙聞喜關宴所賜錢並仍舊官給餘從之

九月禮部貢院言選制勅內該合行二十五道理有未盡條例長興四年詔明經對墨義已前無此條例清泰

二年二月詔明經念疏每問三道後許請熟卷都問十道通六即放入策天成五年二月詔學究不念書試墨義三十道清泰二年三月詔學究依舊念書并注十道後別試墨義十道及格即放入策

長興二年二月詔進士引試早入試晚出者今請依舊例進士試雜文並點門入省經宿就徃例童子表薦不解送每年所放不過十人長興四年三月詔許放二十人應順元年正月詔許放十五人今請如最後勅人數

長興元年詔進士九經五經明經五科童子外諸色科目並停緣舊有明筭道舉令欲施行長興二年正月詔每年落第舉人免取文解今欲依元格諸科並再取解以十月二十五日到省畢違限不收以天成四年詔諸色舉人入試前五日納試紙用中書省印訖付貢院院司緣五科所試場數極多旋用紙鑱宿內中書往來不便請祇用當司印從之

其月舉人張洞而下以去年落第人各於鄉里取解以

試期近來往不及乞今年且徇舊例從之來年即勒本  
州取解

三年五月明經崔貺等經中書訴宋州節度掌書計上  
封事貢舉人須依舊格取本州里文解者見附國子監  
諸生赴舉皆不取文解條例異同詔曰凡布化條惟務  
均一苟公平之無爽即中外以適從國子監每舉舉人  
皆自四方來集不詢解送何辨是非其附監舉人並依  
去年八月一日勅須取本處文解如不及第者次年便



許監司解送若初投名未嘗令本處取解者初舉落第後監司勿更收補其淮南江南黔蜀遠人即不拘此例監生禮部補令式在焉

晉高祖天福三年三月翰林學士承旨兵部侍郎權知貢舉崔稅奏臣謬蒙眷渥叨掌文衡實憂庸懦之材不副搜羅之旨敢不揣摩頑鈍絕杜阿私上則顯陛下求賢次則使平人得路但以今年就舉比常歲倍多科目之中克豪甚衆每駁榜出後則時有喧張不自省循但

言屈塞互相朋扇各出言詞或云主司不公或云試官受賂實慮上達聖聽微臣無以自明晝省夜思臨深履薄今臣欲請令舉人落第之後或不甘心任自投狀披陳却請所試與疏義對證兼令其日一甲同共較量若獨委試官恐未息詞理儻是實負抑屈則所司固難逭憲章如其妄有陳論則舉人乞痛加懲斷異此際免虛遭謗議亦將來可遠久施行儻蒙聖造俞允伏乞降勅處分從之

四年六月勅尚書禮部歷代懸科為時取士任使貴期於稱職搜羅每慮於遺才其如銓司注官員闕有限貢闈考第人數不常雖大朝務廣於選求而常調頗聞於淹滯每候一闕或經累年遂令羈旅之人多起怨咨之論將令通濟須識從權庶幾進取之流更勵專勤之業其貢舉公事宜權停一年

五年三月詔及第舉人與主司選勝筵宴及中書舍人鞞鞋接見舉人兼兵部禮部引人過堂之日幕次酒食

會客悉宜廢之

四月禮部侍郎張允奏曰明君側席雖切旁求貢士觀  
光豈宜濫進竊窺前代未設諸科始以明經俾昇高第  
自有九經五經之後及三禮三傳已來孝廉之科遂因  
循而不廢縉紳之士亦緘默而無言以至相承未能改  
作每歲明經一科少至五百已上多及一千有餘舉人  
如是繁多試官豈能精當況此等多不究義唯攻帖書  
文理既不甚通名第豈可妄與且當年登科者不少相

次起選者甚多州縣之間必無貢闕輦轂之下須有稽  
留怨嗟自此而興謗讟因茲而起但令廣場大啟諸科  
並有明經者悉包於九經五經之中無出於三禮三傳  
之內若無釐革恐未便宜其明經一科伏請停廢又奏  
國家懸科待士貴務搜揚責實求才須除訛濫童子每  
當就試止在念書背經則雖似精詳對卷則不能讀誦  
及名成貢院身返故鄉但刻日以取官更無心而習業  
濫蠲徭役虛占官名其童子一科亦請停廢勅明經童

子宏詞拔萃明筭道舉百篇等科並停

六年五月勅明法一科今後宜令五選集合格注官因仍優與處分

少帝開運元年八月詔曰明經童子之科前代所設蓋期取士良謂通規爰自近年暫從停廢損益之機未見牢籠之義全虧將闡斯文宜依舊貫庶臻至理用廣旁求其明經童子二科今後復置

十一月工部尚書權知貢舉竇貞固奏進士考試雜文

及與諸科舉人入策厯代已來皆以三條燭盡為限長興二年改令晝試伏以懸科取士有國常規沿革之道雖殊公共之情難失若使就試兩廊之下揮毫短景之中視晷刻而惟畏稽遲演詞藻而難求妍麗未見觀光之美但同款答之由既非師古之規恐失取人之道今於考試之時准舊例以三條燭為限其進士并諸色舉貢人等有懷藏書冊入院者舊例扶出不令就試近年以來雖見懷藏多是容縱今欲振舉弛紊明辨臧否莫

在必行庶為定式

十二月勅禮部貢院自前考試進士皆以三條燭為限并諸色舉人等有懷藏書冊不令就試宜並准舊施行從竇貞固奏也

漢隱帝乾祐二年刑部侍郎邊歸讜上言臣竊見每年貢舉人數甚眾動應五舉六舉多至二千三千既事業不精即人文何取請勅三京鄴都道州府長官合發諸色貢舉人文解者並須精加考校事業精研即得解



送不得濫有舉送冀塞濫進之門開興能之路勅從之  
其間條奏未盡處下貢院錄天福五年四月二十七日  
勅文告諭天下依元勅條件施行如有故違其隨處考  
試官員當准勅條處分

周太祖廣順二年二月禮部侍郎趙上交奏貢院諸科  
今欲不試泛義口義共十五道改試墨義共十一道從  
之

三年正月戶部侍郎權知貢院趙上交奏九經舉人元

帖經一百二十帖墨義三十道臣今欲罷帖經於諸經  
對墨義一百五十道五經元帖八十帖墨義二十道今  
欲罷帖經令對墨義一百道明經元帖書五十帖今欲  
罷帖書令對義五十道明法元帖律令各十帖義二十  
道今欲罷帖律令對義二十道學究元念書二十道對  
義二十道今欲罷念書對義五十道三禮元對墨義九  
十道三傳元對義一百一十道欲三禮於周禮儀禮各  
添義二十道三傳於公羊穀梁傳各添義二十道開元

禮三史元義三百道欲各添義五十道進士元添試詩  
賦各一首帖書二十帖對義五道欲罷帖書別試雜文  
二首試策並仍舊童子元念書一十四道欲添念通前  
五十道念及三十道者放及第從之

九月翰林學士承旨刑部侍郎知制誥權知貢舉徐合  
符奏貢舉之司條貫之道有沿有革或否或臧蓋趣向  
之不同致施行之有異今欲酌其近例按彼舊規叅而  
用之從其可者謹條如右九經元格帖經一百二十帖

對墨義汎義口義共六十道策五道去年知舉趙上交  
起請罷帖書汎義口義都對墨義一百五十道合今請  
去汎義口義都對墨義六十道其帖書對策依元格五  
經元格帖書八十帖對墨義五十道臣今請對墨義十  
五道其帖書對策依元格明法元格帖律令一十帖對  
律令墨義二十道策試十條去年罷帖對墨義六十道  
策試如舊臣今請並依元格學究元格念書對墨義各  
二十道策五道去年罷念書都對墨義五十道今請依

去年起請三禮元格對墨義九十道去年添四十道臣  
今請並依元格三傳元格對墨義一百一十道去年對  
四十道臣今請並依元格開元禮三史元格各對墨義  
三百道第五道去年加對五十道臣今請並依元格進  
士試雜文詩賦帖經二十帖對墨義五道去年代帖經  
對義別試雜文二首臣今請依起請別試雜文其帖書  
對義請依元格童子元格念書二十四道起請添念書  
都五十道及三十通者放臣請依起請勅國家開仕進

之路設儒學之科校業掄才登賢舉俊其或藝能素淺  
履行無聞來造科場要求僥倖及當試落便起怨嗟謗  
議沸騰是非蜂起至有偽造制勅之語扇惑儕流巧為  
誣毀之言隱蔽名姓以茲取事得非薄徒宜立憲章以  
示澄汰其禮部貢院條奏宜依仍於引試之時精詳考  
校逐場去留無藝者雖應年深不得饒僭場數若有藝  
者雖當黜落並許訴陳祇不得於街市省門故為喧競  
及投無名文字訛毀主司如有故違必行嚴斷本司鎖

宿後御史臺開封府所差守當人專切覺察其有不自  
苦辛祇憑勢援潛求薦託俯拾科名致使孤寒滯於進  
取起今後主司不得受薦託書題如有書題密具姓名  
聞奏其舉人不得就試今後舉人須取本鄉貫文解若  
鄉貫阻隔祇許兩京給解

世宗顯德元年十一月勅國子監所解送廣順三年已  
前監生人數宜令禮部貢院收納文解其今年內新收  
補監生祇仰落下今後須是監中受業方得准令式收

補解送先是國學收補監生顯有條例邇來學官因循多有近甸州府不得解者即投監請補送省率以為常是歲主文者知其弊因取監司所送學生七十四人狀事詳之例不合於令或悉不收試由是移刺紛紜更相援引監司舉奏束修之條以塞其議貢院告於執政因達於上聽故降是命議者非成均而是禮闈

二年三月勅尚書禮部貢院奏今年新及第進士李覃嚴說何曦武允成王汾閻丘舜卿楊徵之任惟吉趙隣



幾周度張慎微王翥馬文劉選程浩然李震等一十六人所試詩賦文論策文等國家設貢舉之司求英俊之士務詢文行方中科名比聞近年以來多有濫進或以年勞而得第或因媒勢以出身今歲所放舉人試令看驗果然紕繆須至去留其李覃何曦楊徵之趙隣幾等四人宜放及第其嚴說武允成王汾閻丘舜卿任惟吉周度張慎微王翥馬文劉選程浩然李震等一十二人藝學未精並宜勾落且令苦學以俟再來禮部侍郎劉

溫叟失於選士頗屬因循據其過尤合行譴謫尚示寬恕別具條理聞奏

五月翰林學士尚書禮部侍郎知貢舉竇儀上言伏以朝廷設科比來取藝州府貢士祇合薦能爰因近年頗隳舊制其舉子之弊也多是纔謀習業便切干名周儀未詳赴三禮之舉公毅不究應三傳之科經學則偏試帖由進士則鮮通經義取解之處壽張妄說於辛勤到京之時奔競惟求於薦託其舉送之弊也多是明知荒

淺具委克麓新差考試之官利其情禮之物雖所取無  
幾實啟倖非輕凡對問題任從同議謾鑿通而鑿否了  
無去以無留惟徇人情僅同兒戲致令至時就試不下  
三千每歲登科罕踰一百假使無添而漸放約須畢世  
而方周乃知難其舉則至公而有益於人易其來則小  
惠而無實於事有益者知濫進不得必致精勤無實者  
欲多放無能虛令來往且明經所業包在諸科近間應  
者漸多其研精者益少又今之童子比號神童既幼稚

之年稟神異之性語言辯慧精采英奇出於自然有則  
可舉竊聞近日實異於斯抑嬉戲之心教念誦之語斷  
其日月委以師資限隔而游思不容仆跌而痛楚多及  
孩童之意本未有知父母之情恐或不忍而復省試之  
際歲數難知或念誦分明則年貌稍過或年貌適中則  
念誦未精及有司之去留多家人之訴訟伏况晉朝之  
日罷此三科年代非遙勅又見在今宜釐革別俾進修  
臣謬以非才獲承此任本重難而為最復遺闕以相仍

虔奉勅文重令條奏或從長而仍舊亦因弊以改為上副聖情廣遵公道除依舊格勅施行外其明經童子請却依晉天福五年勅停罷任改就別科赴舉其進士請今後省卷限納五卷已上於中須有詩賦論各一卷餘外雜文詞篇並許同納祇不得有神道碑誌文之類其帖經對義並須實考通三已上為合格將來却復畫試候考試終場其不及第人以文藝優劣定為五等取文字乖舛詞理紕繆最甚者為第五等殿五舉其次者為

第四等殿三舉以次稍優者為第三第二第一等並許  
次年赴舉三禮請今後解試省試第一場禮記第二場  
周禮第三場儀禮三傳第一場左氏第二場公羊第三  
場穀梁並終而復始學究請今後周易尚書併為一科  
每經對墨義三十道仍問經考試毛詩依舊為一科對  
墨義六十道及第後請並減為上選集諸科舉人所對  
策間或不應問曰詞理乖錯者並當駁落其諸科舉人  
請第一場十否者殿五舉第二場三場十否者殿三舉

其三場內有九否者並殿一舉其進士及諸科所殿舉數並於所試卷子上朱書封送中書門下請行指揮及罪發解試官監官等其監官試官如受取解人情禮財物請今後並准枉法贓論又進士以德行為基文章為業苟容欺詐何稱科名近年場中多有詐偽託他人之述作竊自己之聲光用此面欺將為身計宜加條約以誠輕浮今後如有倩人述作文字應舉者許人告言送本處色役永不得仕進又切覽唐書見穆宗朝禮部侍

郎王起奏所試貢舉人試訖申送中書候覆訖下當司  
然後大字放榜是時從之臣欲請將來考試及第進士  
先具姓名雜文申送中書奏覆訖下當司與諸科一齊  
放榜詔並從之唯進士并諸科舉人放榜一依舊施行  
四年冬十月詔曰制策懸科前朝盛事莫不訪賢良於  
側陋求謙正於箴規殿廷之間帝王親試其或大裨於  
國政有益於時機則必待以優恩縻之好爵拔竒取異  
無尚於茲得人者昌於是乎在爰從近代久廢此科懷



才抱器者鬱而不伸，隱耀韜光者晦而莫出。遂使翹翹之楚，多致於棄捐皎皎之駒，莫就於縻繫遺才滯用闕孰甚焉。應天下諸色人有賢良方正能直言極諫經學優深可為師法詳閑吏理達於教化等者不限前資見任職官黃衣草澤並許應詔其逐處州府依每年貢舉人式例差官別考試解送尚書吏部仍量試策論三道共三千字已上當日內成取文理俱優人物爽秀者方得解送取來年十月集上都其登朝官亦許上表自舉

時兵部尚書張昭條奏請興制舉故有是詔

五年三月詔曰比者以近年貢舉頗是因循頻詔有司精加試練所異去留無濫優劣昭然昨據貢院奏今年新及第進士等所試文字或有否臧爰命詞臣再令考覆庶涇渭之不雜免玉石之相參其劉垣戴貽慶李頌徐緯張覲等詩賦稍優宜放及第王汾據其文字亦未精當念以涇曾剝落特與成名熊若谷陳保衡皆是遠人深可嗟念亦放及第郭峻趙保雍楊丹安元度張昉

董咸則杜思道等未甚苦辛並從退落更宜修進以俟

將來知貢院右諫議大夫劉濤選士不當有失用心可

責授右贊善大夫俾令省過以誠當官

先是濤於東京放榜後率新及

第進士劉坦已下一十五人來赴行在以其所試詩賦進呈上以其詞紕繆命翰林學士李昉覆試故有是命

六年正月壬子對諸道貢舉人石熙載等三百餘人於

萬春殿舊例每歲舉人皆見於閣門外上以優待儒者

故允其入見

甲戌詔曰起今後每年新及第進士及諸科舉人聞喜

宴宜令宣徽院指揮排比先是禮部每年及第人聞喜宴皆自相醵飲以備馬帝以優待賢雋故有是命

乙亥詔曰禮部貢院起今後應合及第舉人委知舉官依逐科等第定人數姓名并所試文字聞奏候勅下後  
放榜



冊府元龜卷六百四十二

欽定四庫全書

子部

冊府元龜卷六百四十六

三至六

詳校官中書臣朱文翰

侍讀臣孫球覆勘

總校官庶吉士臣何思鈞

校對官學正臣常循

謄錄監生臣潘河

欽定四庫全書

冊府元龜卷六百四十三

宋 王欽若等撰

貢舉部

考試

夫人君之有區宇也不可以獨治必求賢以共之賢士  
之懷德業也不可以自進必待君以任之所以舉善惡  
賢前古之明訓掄才考藝看國之大方唐虞之際於斯  
為盛漢魏之下可得而論納敷奏之言則衆善必舉下

賢良之詔則羣才競進經濟之業斯備甲乙之科乃懸  
以至較藝實之精微察器識之優異授之王爵任以民  
政郡國以康風俗以化得人之效於斯可見求賢之道  
百世可知

漢文帝十五年詔有司舉賢良文學士帝親策詔之

臣欽

若等曰凡判策有對者並具貢舉  
對策門其史不對者即錄於此

武帝元光元年五月詔賢良曰朕聞昔在唐虞畫象而

民不犯

二帝但畫衣冠異章服而民不敢犯也白虎通  
云畫象者其衣服象五刑也犯墨者蒙中犯劓



者以赭着其衣犯黷者以墨蒙其體象而盡之犯宮者  
非犯大辟者布衣無領墨謂以墨點其面也刺截其鼻  
也髓去膝蓋骨也宮割其陰也非草履也刺音牛冀  
切字或作刺其音同耳髓音類忍切非音扶味切

月所燭莫不率俾

燭炤也率循也俾使也言皆循其貢職而可使也

周之成康

刑措不用

措置也音一故切

德及鳥獸教通四海海外肅眚

東夷

今挹婁地是也在天余之東北千餘里大海之濱周書序云成王既伐東夷肅眚來賓即謂此

北發渠

搜

禹貢析支渠搜屬雍州在全城河關之西戎也地理志朔方有渠搜縣孔子三朝記云北發渠搜南撫

交趾此舉北以南為對也禹貢渠搜在雍州西北渠搜在朔方

氏羌徠服

徠古往來之字也氏音丁

切

星辰不孛日月不蝕山陵不摧川谷不塞麟鳳在郊

藪河雒出圖書鳴序何道而臻此與

序讀曰呼

今朕獲奉宗

廟夙興以求夜寐以思若涉淵水未知所濟猗與偉與

與讀曰歟音戈於切

何行而可以章先帝之洪業休德上參堯舜

下配三王朕之不敏不能遠德

言德不及遠也

此子大夫之所

睹聞也

睹古親字

賢良明於古今王事之體受策察問咸以

書對著之於篇

篇謂竹簡

朕親覽焉於是董仲舒公孫弘等

出焉

後漢光武建武十九年巡狩汝南召掾史試經郡小吏

周防猶誦讀拜為守丞

順帝陽嘉元年七月丙辰以太學新成試明經下第者  
補弟子增甲乙科員各十人除郡國耆儒九十人補郎  
舍人

二年有地動山崩火災之異公卿舉李固對策

陽嘉二年詔公

卿舉敦朴之士衛尉賈逵舉固也

詔又特問當世之弊為政所宜

質帝本初元年四月令郡國舉明經年五十以上七十以下  
詣太學自大將軍至六百石皆遣子受業歲滿課試以

高第五人補郎中次五人太子舍人千石六百石四府

掾屬三署郎四姓小侯先能通經者各令隨家法

四府掾屬

諸大將軍掾屬二十九人太尉府掾屬二十四人司徒府三十一人司空府二十九人漢官左右中郎將皆秦官也北二千石三署郎皆屬焉三署謂五官署左右署也儒生為詩者謂之詩家禮者謂之禮家故言各隨家法也四姓小侯解見上

其高第者上名牒當以資賞進

靈帝熹平五年十二月試太學生年六十以上百餘人除郎中太子舍人至王家郎郡國文學吏

獻帝初平四年九月試儒生四十餘人上第賜位郎中

次太子舍人下第者罷之詔曰孔子歎學之不講不講則所識日忘今耆儒年踰六十去離本土營求糧資不得專業結童入學白首空歸長委農野永絕榮望朕甚

愍焉其依科罷者聽為太子舍人

時長安宮中為之謔曰頭白皓然食不充

糗裹衣褰裳當還故鄉聖主愍念悉用補郎舍是布衣被服玄黃

晉武帝泰始中詔天下舉賢良直言之士濟陰太守文立舉郤詵應選詔曰益太上一以德撫時易簡無文至於三代禮樂大備制度彌繁文質之變其理何由虞夏之

際聖明接踵而損益不同周道既衰仲尼猶曰從周因  
革之宜又何殊也先王既沒遺制猶存霸者迭興而翼  
輔之王道之缺其無補乎何凌遲之不反也豈霸德之  
淺期運不可致歟且夷吾之智而功止於霸何哉夫昔  
人之為政革亂亡之弊建不刊之統移風易俗刑措不  
用豈非化之盛歟何修而嚮茲朕獲承祖宗之休烈於  
茲七載而人未服訓政道罔述以古況今何不相逮之  
遠也雖明之弗及猶思羣賢慮之將何以辨所聞之疑

昧獲至論於讜言乎如頃戎狄內侵災害屢作邊氓流  
離征夫苦役宜政刑之謬將有司非其任歟各悉乃心  
究而論之上明古制下切當今朕之失德所宜振補其  
正議無隱將敬聽之

摯虞舉賢良與夏侯湛等十七人策為下第拜中郎武  
帝詔曰省諸賢良答策雖所言殊塗皆明於王義有益  
政道欲詳覽其對究觀賢士大夫用心因詔諸賢良方  
正直言會東堂策問曰頃日蝕正陽水旱為災將何所

修以變大青及法令有不宜於今為公私所患苦者皆何事凡平世在於得才得才者亦借耳目以聽察若有文武器能有益於時務而未見申叙者各舉其人及有負俗謗議宜見洗濯者亦各言之

阮种察孝廉為公府掾是時西戎內侵災青屢見百姓饑饉詔王公卿尹常伯牧守各舉賢良方正直言之士於是太保何曾舉种賢良策曰在昔哲王承天之序光宅宇宙咸用規矩乾坤惠康品類休風流行瀰於千載



朕應踐洪運統位七載於今矣惟德弗嗣不明於政宵  
興惕厲未燭厥猷子大夫韞贛道術儼然而進朕甚嘉  
焉其各悉乃心以闡喻朕志深陳王道之本勿有所隱  
朕虛心以覽之种對曰夫天地設位聖人成能王道至  
深所以行化至遠故能開物成務而功業不匱近無不  
服德逮羣生澤被區宇聲施無窮而典垂百代故經  
曰聖人久於其道而天下化成宜師蹤往代襲迹三五  
矯世更俗以從人望令率土遷義下知所適播醇美之

化杜邪枉之路斯誠羣黎之所欣想盛德而幸望休風也又問政刑不宣禮樂不立又問咎徵作見又問經化之務又問將使武成七德文濟九功何路而臻於茲凡厥庶事昌後昌先

華譚廣陵人太康中徐州刺史嵇紹舉譚秀才譚至雒陽武帝親策之曰今四海一統萬里同風天下有道莫斯之盛然北有未羈之虜西有醜施之氏故謀夫未得高枕邊人未獲晏然將何以長弭斯患混清六合又策

曰吳蜀恃險今既蕩平蜀人服化無攜貳之心而吳人  
趨睢屢作妖寇豈蜀人敦樸易可化誘吳人輕銳難安  
易動乎今將欲綏靜新附何以為先又策曰昔帝舜以  
二八成功文王以多士興周夫制化在於得人而賢才  
難得今大統始同宜搜才實州郡有貢薦之舉猶未獲  
出羣卓越之倫將時無其人而有致之未得其理也

甘卓為湘州刺史中興初以邊寇未靜學校陵遲特聽  
不試孝廉而猶依舊策試卓上疏以為答問損益當須

博通古今明達政體必求諸墳索乃堪其舉臣所忝州  
往遭寇亂學校久替人士流播不得比之餘州策試之  
繇當藉學功謂宜同孝廉例繇與限期疏奏朝議不許  
卓於是精加隱括備禮舉桂陽毅儉為秀才儉辭不獲  
命州厚禮遣之諸州秀才聞當考試皆憚不行唯儉一  
人到臺遂不復策試儉取其州少士乃表求試以高第  
除中郎

宋高祖永初二年二月車駕幸延賢堂策試諸州郡秀

才孝廉揚州秀才顧練豫州秀才殷郎所對稱旨並以  
為著作佐郎

南齊武帝永明四年車駕幸中堂策秀才

謝幾卿起宗之子召補國子生齊文惠太子自臨策試謂  
祭酒王儉曰幾卿本長玄理可以義訪之儉承旨發問幾  
卿隨事辨對文惠大稱賞焉儉謂人曰謝起宗為不死矣  
梁戚衮年十九武帝勅策孔子正言并周禮禮記義衮對  
高第乃除揚州祭酒

後魏孝文太和十六年正月帝臨思議殿策問秀才

北齊正會日侍中黃門宣詔勞諸郡上計勞訖付紙遣  
陳土宜字有脫誤者呼起席後立書迹濫劣者飲墨水  
一升文理孟浪無可取者奪容刀及席既而本曹郎中  
考其文迹才辭可取者錄牒吏部簡用流外三品叙  
武成帝河清二年正月帝詔臨堂策試秀才

馬敬德河間人也以好儒術河間郡王每於教學追之  
將舉為孝廉固辭不就乃詣州求秀才例取文士州將

以其純儒無意推薦故德請試方畧乃策問之所答五條皆有文理乃欣然舉送至京依秀才策問十條並通擢授國子助教遷太學博士

隋房暉遠為國子博士開皇中文帝令國子生通一經者並悉薦舉將擢用之既策問訖博士不能的定臧否祭酒元善恠問之暉遠曰江南江北義例不同博士不能遍涉學生皆持其所短稱其所長博士各自疑所以久而不決也祭酒因令暉遠考定之暉遠覽畢便下初

無疑滯或有不服者暉遠問其所傳義疏輒為始末誦之然後出其所短自是無敢飾非者所試四五百人數目便決諸儒莫不推其通博皆自以為不能測也

杜正玄開皇末舉秀才尚書試方畧正玄應對如響下筆成章僕射楊素負才傲物正玄抗詞酬對無所屈撓素不悅久之會林邑獻白鸚鵡素促召正玄使者相望及至即令作賦正玄倉卒之際援筆成章素見文不加點始異之因令更擬諸雜文筆十有餘條又皆立成而



辭理華贍素乃嘆曰此真秀才吾所不及也

唐太宗貞觀十八年三月己丑有鄜州所舉孝廉賜坐於御前帝問曰歷觀往古聖帝明王莫不得一奉天必以黎元為本隆邦建國亦以政術為先天以氣變物莫知其象君以術化人不顯其機氣以隱質為虛術以潛通為妙運之無為施之無極故能清風蕩萬域長轡控八荒不令而行不言而信欲尊此術未辨其方想望高才以陳良策孝廉等久之無對又令皇太子問之曰夫

子何以為魯參說孝經孝廉答云夫子以弟子之中參最稱孝所以為說太子曰禮記云公明儀問曾子曰夫孝子先意承志喻父母於善參直養而已安能為孝據此而言參未云孝又問禮云居處不莊非孝也事君不忠非孝也蒞官不敬非孝也朋友不信非孝也戰陣無勇非孝也五者不遂災及於親此五孝施用若為差等孝廉不能答次令近臣迭問仁孝之名誰所創作明其優劣仁孝何先又問孝廉於四行之內居第幾科又問

社主之義殷栢周粟秦漢以來若為變改又問堯舜聖  
德應貽厥孫謀何因朱均以降絕滅無後孝廉並不能  
答帝曰昔楚莊王謀事羣臣莫及退而有憂色曰諸侯  
能自得師者王自為謀而莫已若者亡今以不穀之不  
肖羣臣莫吾逮吾國幾亡乎朕發語徵天下俊異纔以  
淺近問之咸不能答海內賢哲將無其人耶朕甚憂之  
令引就中書省射策所答乖旨於是下詔曰朕遐想千  
載旁覽九流詳求布政之方莫若薦賢之典是以元凱

就列仄微可以立帝功管隰為臣中人可以成霸業朕  
緬懷曩烈虛已英竒斷斷之士必昇於廊廟九九之術  
不棄於閭閻猶恐在陰弗和獨善難奪永言髦傑無忘  
寤寐是以去夏之中爰動翰墨披露丹府疇咨海內尺  
木既樹思覩游霧之羣雲羅宏舉佇降翔庭之翼而諸  
州所舉十有一人朕載懷仄席引入內殿借以溫顏畧  
訪政道莫能對敷相顧結舌朕仍以其未覩廷闕能無  
戰慄令於內省更以墨對雖構思彌日終不答問旨理

既乖違詞亦庸澁豈可飾丹漆於朽質假風雲於決起者哉宜並放還各從本色其舉主以舉非其人罪論仍加一等然則今之天下猶古之天下也寧仲舒伯始之流偏鍾美於往代秀彥廣基之侶猶絕響於今辰故其見之也則平津與樂安並進其不用也則敬通與寧伯同悲淮陽所以興言子長所以始嘆因斯論之良繇俊造難進或固棲遲之節牧宰循常未盡搜揚之道撫事長息彌增憮然其令州縣依前薦舉皆集今冬奇偉必

收浮華勿採無使巴人之調濫吹於蕭韶魏邦之珍沉  
光於江漢務盡報國之義以副興賢之懷

高宗顯慶四年二月引諸色目舉人謁見下詔策問之  
凡九百餘人唯李巢張昌宗秦相如崔行功郭待封五  
人為上第令待詔弘文館仍時隨仗供奉

調露元年十二月壬子帝臨軒引岳牧舉人問之曰兵  
書云天陣地陣人陣各何謂武陟尉員半千對曰臣觀  
載籍謂天陣星宿孤虛也地陣山川向背也人陣偏伍

彌縫也臣以為不然夫師出以義有若時雨得天之時此天陣也兵在足食且耕且戰得地之利此地陣也三軍使兵士如父子兄弟得人之利此人陣也三者去矣將何以戰帝又問皇道帝道王道何以區別朕今可行何道長壽令蕭思問越州參軍周彥昭以次應詔帝皆稱善甲寅御製間日以試之

則天載初元年太后臨朝二月十四日試貢舉人於雒

城殿前數日畢

臣欽若等曰殿前試人自茲始也

玄宗開元九年四月甲戌親策試應舉人於含元殿謂曰古有三道今減從一道近無甲科朕將存其上第務收賢俊用寧軍國仍令有司設食

五月壬戌有司引應制舉人見勅曰興化立理急於雋賢呈才效用屬在文武朕恭默思道寤寐旁求長想幽仄屢申徵賁今邊隅未靜師旅時興屬聽鼓鼙載懷屠釣廣求百夫之特以作四方之守總夫戎政爰詔武臣弘我風教諒惟儒林卿等或謀慮深遠或學藝該通來



應旌招深副虛佇並宜朝堂坐食訖且歸私第即當有  
試期也

乙亥親試應制舉人於含元殿命有司置食勅曰卿等  
知蘊韜畧學綜古今喬木將遷虛鍾待扣既膺旁求之  
辟佇聞明試之言各整爾能對朕所問古有三道朕今  
減其二策近無甲科朕將存其上第務收賢雋用寧軍  
國並宜即存緩詳思之

十四年七月癸巳上御雒城南門樓親試岳牧舉人及

東封獻賦頌人命太官置食賜物有差

十五年五月詔中書門下引文武舉人就中策試於是  
藍田縣尉蕭諒右衛胄曹梁涉邠州柱國子張玘等對  
策稍優錄奏帝謂源乾曜杜暹李元紘等曰朕宵衣旰  
食側席求賢所以每念搜揚者恐草澤遺才無繇自達  
至如畿尉衛佐未經推擇更與褐衣爭進非朕本意繇  
是唯以張玘為下第放選餘悉罷之

九月庚辰帝御雒城南門親試沉淪草澤詣闕自舉文

武人等

二十六年八月甲申親試文詞雅麗舉人命有司置食  
勅曰古者求士必擇其才考之以文施於有政自非體  
要何用甄明頃年以來亦常親試對策者衆而登科者  
少蓋繇宿構之詞不與所問相對所以然也卿等博達  
古今聿膺推薦朕之所以問有節目宜措事而對勿措  
游辭並宜坐食訖就試有郭納姚子彥等二十四人  
升第皆量資授官

二十九年八月御興慶門樓親試明道德經及莊文列  
子舉人問策曰朕聽政之暇常讀道德經文列莊子其  
書文約而義精詞高而旨遠可以理國可以保身朕敦  
崇其教以左右人也子大夫能從事於此甚用嘉之夫  
古今異宜文質相變若在宥而不理外物而不為行遂  
古之化非御今之道適時之術陳其所宜又禮樂政刑  
所以經邦國聖智仁義所以序人倫使之廢絕未知其  
旨道德經曰絕學無憂則乖進德修業之教列子力命

曰汝奚功於物又違慙惡勸善之文二旨孰非何優何劣  
文子曰金積折廉壁壘宜申其義莊子曰恬與和交  
相養明徵其言使一理混同二教兼舉成不易之則副  
虛佇之懷有姚子彥靳能元載等入第各授之以官

天寶元年九月庚申御花萼樓試文武舉人命有司供  
食

十月應文詞秀逸舉人崔明允等二十人儒學博通劉  
恁等八人軍謀越衆令狐朝等七人並科目各依資授

官

十載九月辛卯御勤政樓試懷材抱器舉人命有司供  
食有舉人私懷文策坐殿三舉並貶所保之官

丙申舉人並下第勅曰朕祇膺寶曆殷鑒遠圖慮草澤  
之遺賢降弓旌於屢辟是以三紀於茲羣材輻湊或一  
言可紀必適輪轅一善有經每加獎進庶六合之內靡  
然同風四科之門咸能一貫何茲意之緬邈而增修之  
寂寥今者舉人深乖宿望朕之所問必正經史卿等所

答咸皆少通所問多否以獨鑒未周必資僉議爰命朝  
賢三事精加詳擇咸以為闕於聚學莫可登科至於每  
歲秀才有司考試帖經問策兼以雜文假如及第在階  
選序今之將舉待以榮班各非異才孰可超獎壑鑿經  
傳且未精勤俯拾青紫宜倖覲其懷才抱器舉人並  
放更習學即好去其有不對策羅嘉茂既是白丁宜於  
劄南効力全不答所問崔慎或劉灣等勒為本郡充學  
生之數勿許東西其所舉官各量貶殿以示懲誡

十三載十月御舍元殿親試博通墳典洞曉五經詞藻  
宏麗軍謀出衆等舉人命有司供食既而暮罷其詞藻  
宏麗科問策外更試律賦各一首制舉試詩賦自此始  
也時登甲科者三人太子正字楊綰最為所稱乙第者  
凡三十餘人

肅宗乾元二年三月丁亥御宣政殿親試文經邦國等  
四科舉人

代宗寶應二年五月丙寅尚書省試應制舉人在丞侍



郎對試賜舉人食如舊儀

大厯二年十月御紫宸殿策試茂才異行安貧樂道孝悌力田高道不仕等四科舉人

六年四月戊午御宣政殿親試諷諫主文茂才異等智謀經武博學專門等四科舉人帝親慰免有司常食外更賜御厨珍饌及茶酒禮甚優異舉人或有敝衣菜色者帝憫之謂左右曰兵革之後士庶未豐皆自遠來資糧不足故也因為之泣下時方炎暑帝具朝衣永日危

坐讀太宗貞觀政要及舉人策成悉皆觀覽一百餘道  
將夕有策未成者命大官給燭令盡其才思夜分而罷  
時登科者凡一十五人

冊府元龜卷六百四十三

欽定四庫全書

冊府元龜卷六百四十四 宋 王欽若等 撰

貢舉部

考試第二

唐德宗貞元元年九月乙巳御宣政殿策賢良方正能  
直言極諫等三科舉人皇帝若曰蓋聞上古至道之君  
垂拱無為以臨海內不理而人化不勞而事成星辰軌  
道風雨時若邈乎其不可繼何施而臻此與三代以來

制作滋廣異文質之變明利害之嚮威之以刑道之以  
禮敦其俗而彌薄防其人而益踰豈澆醜必繫於時邪  
何聖賢間生而莫之振也朕祇膺累聖之業猥居兆人  
之上虔恭求厲如恐失墜憂濟庶務夕惕晨興唯求前  
王之典謀朕乃是憲是則師大禹以崇儉法高宗以求  
賢興夏啟之征作周文之罰旌孝悌舉直言養高年敦  
本業平均徭稅黜陟幽明勵精孜孜勤亦至矣然而浮  
靡不革理化不行暴亂不懲姦犯不息五教猶鬱七臣

未臻鄉黨廢尚齒之儀蒸黎無安土之志賦入日減而  
私室愈貧廉察月增而吏道愈濫意者朕不明歟何古  
今之事同而得失之效異也思欲剋革前弊創立新規  
施之於事而易從考之於文而有據備陳本末將舉而  
行無或憚煩略於條對自頃陰陽舛候稔沴薦興仍歲  
旱蝗稼穡不稔上天作孽必有由然屢降凶災其咎安  
在傳曰時之不乂厥罰暘又曰堯湯水旱數之常也二  
者乖反其誰云從今人靡蓋藏國無廩積朕屢延卿士

詢訪謀猷至乃減冗食之徒罷不急之務既開嘉話亦已遵行而停廢之餘所費猶廣俟轉輸於江徼則遠不及期將搜粟於關中則擾而無獲節軍食則功臣懷怨省吏員則多士靡歸中心浩然罔知攸濟子大夫蘊蓄材器通明古今副我虛求森然就列裨朕之寡昧拯時之艱災畢志直書無所隱

十月甲子授賢良方正能直言極諫韋執誼等一十八人官有差

十年九月丁丑以官授賢良方正能直言極諫前進士  
裴珣等一十人

憲宗元和元年四月丙午命宰臣已下監試應制舉人  
於尚書省以制舉人皆先朝所徵故不親試制曰朕以  
寡薄獲奉唐圖嚴恭寅畏不敢暇逸永惟萬邦之廣庶  
務之殷而燭理未明體道未至思欲復三代之盛烈顯十  
聖之耿光是用詳求正言思繼先志子大夫等藏器斯  
久賁然而來白駒就維洪鍾待扣膺茲獻納朕甚嘉之

言觀國光宜有廷試本將詢事豈忘臨軒園邑有期營  
奉是切求言誠感未暇躬親爰命公相洎於卿士親諭  
朕意延訪嘉謀至於興化之源才識攸重練達吏理詳  
明儒術當是三道副朕旁求意或開予靡有所隱條例  
所問畢志盡規當酌古而參今使文約而意備朕將親  
覽擇善而行並宜坐食訖就試策賢良曰朕觀古之王  
者君人受命兢業敬天順地靡不思賢能以濟其理求  
謹直以聞其過故禹拜昌言而嘉猷罔伏漢徵極諫而



文學稍進康時濟俗固不率絲厥後相循有名無實而  
又設以科條增求茂異捨斥已之至言角無用之虛說  
文旨著明罕稱於代茲朕所以嘆息鬱悼思索其真是  
用虛懇惻之誠咨體用之要庶乎言之可行行之不倦  
上獲其益下輸其情君臣之間驩然相與子大夫得不  
勉思朕言而茂明之我國家光宅四海年將二百十聖  
弘化萬邦懷仁三王之禮靡不講六代之樂罔不舉浸  
澤於下升中於天周漢已還莫斯為盛自禍階漏壞兵

宿中原生人困竭耗其大半農戰非古衣食罕儲念茲  
疲吐遂乖富庶督耕植之業而人無戀本之心峻推酤  
之科而下有重斂之困舉何方而可以復其盛用何道  
而可以濟其艱既往之失何者宜懲將來之虞何者當  
戒昔主父懲患於晁錯而用推恩夷吾致霸於齊桓而  
行寓令精求古人之意啟迪來哲之懷眷茲洽聞固所  
詳究又執契之道垂衣不言委之於下則人用其私專  
之於上則下無其效元帝優游於儒學盛業竟衰光武

責課於公卿峻政非美二途取捨未獲所從余心浩然  
益所疑惑子大夫敦究其旨屬之於篇興自朕躬無悼  
後害

辛酉詔曰構大厦者必總於羣材成大川者必資於百  
谷故思理之主求賢罔遺所以昭宣令圖廣大前緒觀  
文緝化其在茲乎朕以寡昧獲奉丕業虛已問政實始  
於茲考言求益敢不祇若故命左右輔弼洎有位之臣  
會於中臺必究其論間密以獻省自朕躬果獲賢能副

於饑渴才識兼茂明於體用科人第三次等元稹韋惇  
第四等獨孤郁白居易曹京伯韋慶復第四次等崔韶  
羅讓崔護元修薛存慶韋珩第五上等蕭俛李蟠沈傳  
師柴宿達於吏理可使從政科第五上等陳祐等咸以  
待問之美觀光而來詢以三道之要復於九變之選得  
失之覽粲然可觀宜膺德茂之異式叶言揚之舉其第  
三次等人委中書門下優與處分第四次等第四次等第  
五上等中書門下即與處分

三年二月御宣政殿試四科舉人

裴洵元和初台入翰林三年詔舉賢良時

有皇甫湜對策其言激切牛僧儒李宗閔亦苦諫時政考官楊於陵韋貫之考三策皆在第洵居中復視無所同異及為貴幸泣訴請罪於帝帝不得已黜於陵貫之官罷洵翰林學士除戶部侍郎

穆宗以元和十五年正月即位二月壬寅勅應賢良方

正直言極諫科等人宜令中書門下尚書省四品以上

三月二十三日於尚書省同試

三月戊午吏部尚書趙宗儒等奏應制科人等伏奉今

月十一日勅比者先朝徵集應制人等已及時限恐皆

來自遠方難於久住酌宜審事遂委有司定日就試如聞所集之人多已分散須知審的然議裁定其令所司商量聞奏者伏以制科所設本在親臨南省策試亦非舊典今覃恩既畢庶政惟新況山陵日近庶務繁迫待問之士就試非多臣等商量恐須停罷從之

長慶元年三月勅今年進士及第鄭朗等一十四人宜令中書舍人王起主客郎中知制誥白居易試聞奏

四月丁丑詔曰國家設文學之科本求才實苟容僥倖

則異至公訪聞近日浮薄之徒善為朋黨謂之關節干  
擾主司每歲策名無不先定永言敗俗深用興懷鄭朗  
等昨令重試意在精覈藝能不於異書之中固求深僻  
題目貴令所試成就以觀學藝淺深孤竹管是祭天之樂  
出於周禮正經閱其呈試之文都不知其本事詞律鄙  
淺蕪累至多亦令宣示錢徽庶其深自懷愧誠宜盡棄  
以警將來但以四海無虞人心方泰用引寧僭式示殊  
恩特掩爾瑕庶明予志孔溫業趙存約竇洵直所試粗

通與及第盧公亮等十人並落下從自今以後禮部舉人宜准開元二十五年勅及第訖所試雜文并策送中書門下詳覆貶禮部侍郎錢徽為江州刺史

十月詔文武常叅官及諸州府准制舉薦賢良方正人等以十一月二十五日御宣政殿策試宜令所司准式十一月戊午御宣政殿試制科舉人制曰古人有言常引一代之人以理一代之務雖雋賢茂彥不乏於時然亦在敷納以言精覈其實若決川瀆以導其氣考金石



以求其音使抱忠義者必盡其誠知古今者必先其慮  
朕纂承鴻業以撫兆人常欲效三代之禮修烈祖之法  
猶念和氣之未洽休祥之未臻百姓之未安五兵之未  
戢故詳延修潔之士庶得乎未聞將以達天地之心究  
俗化之變研安危之慮探理亂之言子大夫覃思於六  
經馳騫於百氏得不講求至論以沃朕心方直者舉朕  
之闕政術者體時之要慕玄遠者裨其論瞻文詞者抑  
其華言經者折衷於聖人以明教化論將者先之以仁

誼無效縱橫於戲子大夫當朕之時必思自達且古之翼戴其君者尚委輅納說荷擔吐竒由壺闕之上言自南昌而諷刺况文陛之下負宸親臨若藏器不耀結囊而去顧朕深志復何望焉當體予衷無懼後害宜坐食訖就試又策賢良曰蓋聞舜禹之有天下也起於側微積德累勤多歷年所經聖之慮豈有遺哉然猶好問察言勤求賢士蓋以承天之任重憂人之志深也况朕長於深宮涉道日淺奉列聖之洪緒撫萬寓之黎人夙

夜嚴恭不敢有懈實懼燭理未究省躬未明所以詳求  
謹言以輔不逮于大夫是宜發所蘊蓄沃予虛懷當極  
意正詞勿有隱諱昔王政之興必臻於康泰霸道所立  
由致於富彊我國家提封溢於三代斟酌兼乎百王無  
堯湯之災積祖宗之禮而人未蕃庶俗尚彫訛家無蓋  
藏公闕儲侍卒乘之數貨帛之資統而較之莫計前代  
豈率土生殖變於古歟將阜時政令失於今歟固以揣  
摩必窮利病明徵未失之漸具陳興復之舉且文武兼

學以成身士農迭居以豐業故家給足以懲本才周可  
以應時近古各徇一端不相資用政令從事異心難以  
成課民佚無守輕為游惰指明共貫之方訢合二途之  
利永言致理期約厥中施為或差得失斯遠將修睦勸  
義則在下難知將任數馭情則人心益偽思聞旨要得  
合誠明旌別比周之情敷詳忠厚之道知人則哲從古  
攸慎九徵恐泥五事難精或望可服人而智非周物或  
言皆詣理而行者乖方宜定取捨之端以彰真偽之辨

至於朝廷之闕四方之弊詳延而至可得而書退有後  
言朕所不取子大夫其勉之中書舍人白居易膳部郎  
中陳祐考工員外郎賈餽同考制策

十二月辛未制曰朕自郊上玄御端門發大號與天下  
更始思得賢雋標明四科令羣公卿士暨守土之臣詳  
延下位周於草澤成列待問副予虛求昧爽臨軒俾究  
其論正辭良術精義宏謀繹之旬時深見忠益言刈其  
楚列而第之賢良方正能直言極諫第三等人龐嚴第

三次等人呂術第四等人韋曙姚中立李躔第四次等人崔嘏崔龜從任畹第五等人韋正貫崔知白陳玄錫博通墳典達於教化第四等人李思玄詳明政術可以理人第四次等人崔郢軍謀宏遠堪任將帥第三次等人吳思第五等人李商卿咸以懿學茂識揚於朝廷況當短晷之辰頗著論思之美粲然高論深沃朕心永言藏器之規豈忘繫駒之義寵之命秩允答嘉猷其第三等人第三次等人委中書門下優與處分其第四次等

人第五上等人中書門下即與處分

甲申以登制科人前試弘文館校書郎龐巖為左拾遺  
前試秘書省校書郎呂述為右拾遺前試大常寺協律  
郎吳思為右拾遺供奉京兆府富平縣尉韋曙為左拾  
遺內供奉前鄉貢進士姚中立李躔崔嘏並可秘書省  
校書郎同州叅軍崔龜從為京兆府鄠縣尉太子正字  
任畹為京兆府興平尉草澤韋正貫為太子校書郎前  
鄉貢進士崔知白為秘書省正字前鄉貢進士崔郢為

太子校書郎前鄉貢進士李商卿為崇文館校書郎制  
曰昔仲尼之門以四科品第諸生所得十哲今吾徵四  
海九州之士而登名者十有五人搜羅簡拔非不勤至  
以今況古可謂才難是用詔爵以嘉獎其忠超擢以先  
明其道俾巖石之下人思自奮晁董之盛遠以為隣延  
登諫垣式佇忠益讐書結綬皆曰顯途修其秩次亦示  
科等服我遠命助我遠猷可依前件

敬宗寶曆元年三月辛酉詔常參及諸州府准去年三



月三日制舉諸色科目見到總三百一十九人今月二十八日御宣政殿臨試宜付所司准式

辛未帝御宣政殿試制舉人詔曰朕聞心術順道天下可一言而興聰明壅途堂上有千里之遠故唐虞而降則考試觀俗漢魏之際則詔策求賢朕纘紹丕圖撫臨方夏實懼誠有所偏信鑒有所未周乃前歲詔六官九卿方岳尹正有位之士逮於庶僚高懸四科博薦羣彥將訪衆政之闕酌至論之中于大夫庭列儼然可應其

品是用宵興前殿永日渴求條列坦明咸本經史固子  
大夫之所講磨矣當竭誠慮無有蘊藏宜坐食訖就試  
以中書舍人鄭涵吏部郎中李虞仲並充考制策官

丁亥制曰朕深居法宮高處宸極嘗慮天下多務墜於  
上聞朝廷大猷闕於中典至於伏陛叩顙造膝犯顏皆  
驟遷顯榮寵以優錫尤思物不得茂遂道有所鬱埋是  
用虛中訪賢側席前殿緘密以獻閱自朕躬切弼予違  
無所回忌第於上下揚於正朝吾之不老亦可謂信於

海內矣賢良方正能直言極諫科舉人第三等唐仲韋  
端符舒元襄第四等蕭敞楊魯士楊儉來擇趙祝裴暉  
第四次等韋繇李昌實嚴荆田邕崔璜第五上等李漣  
蕭夷中馮球元晦詳閑吏理達於教化科第五上等韋  
正貫軍謀宏遠材任邊將科第三等裴儔第四次等侯  
雲章咸以謹言正詞兵符教本應問如響不窮如泉著  
之於篇爛然盡在宜膺中鵠之選用叶縻爵之經在第  
三等人委中書門下優與處分第四等第四次等第五

上等中書門下即與處分後不數日帝謂宰相曰韋端符楊魯士皆涉物議宜與外官端符授同州白水縣尉魯士授興元府城固縣尉宰臣等竟請罪名不得

文宗太和二年三月辛巳御宣政殿親策試制舉人制曰志本於道蓋道以致君為先代實生才蓋才以濟理為務不索何以獲其實不言何以知其志故帝堯重詢眾之訓殷宗首沃心之術其傳曰嘉言罔攸伏又曰俊民用彰漢魏以還詔策時作暨於我唐遵為故事繇是善政

惟又魁能間出朕祇荷大寶勤恤兆人明不燭於幽暗  
惠未流於鰥寡御朽兢慮求思永圖是以詔命有司會  
羣材列稽疑延闕政子大夫達學通識儼然來思操觚  
濡翰條誨宿滯慰我虛佇必引嘉猷故臨軒命書策以  
審訪繼燭俟奏其悉乃辭各宜坐食食畢就試左散騎  
常侍馮宿太常少卿賈餗庫部郎中龐嚴宜並充考制  
策官是日宰臣等以監侍制舉人及夜並宿於中書省  
甲午詔曰王者謹天戒酌人言叶時凝命資賢贊理斯

為令典也朕以菲德祇膺大統歲屬凶旱人思底寧庶  
察弊以勤理因舉能而詢衆科別條問臨軒致試載搜  
尤才果副虛佇賢良方正能直言極諫科舉人第三等  
裴休裴素第三次等李邠第四等南卓李甘杜牧馬植  
鄭亞崔璵第四次等崔讜王式羅紹京崔渠崔慎繇苗  
愔韋昶崔搏第五上等崔渙韓賓詳閑吏理達於教化  
科舉人第四次等宋昆軍謀宏遠堪任將帥科舉人第  
四次等鄭冠李棻等皆直躬遵道博古知微敷其遠猷

志在引益實能攻朕闕紹政經究天人交際之理極皇  
王道變之義指切精洽粲然可觀既校才於試可宜旌  
能於受祿其第三等第三次等人委中書門下優與處  
分第四次等第五上等人中書門下即與處分時有劉  
蕡應直言極諫科條對激切凡數十言雖不中第其文  
本行於時

三年三月御史臺據吏部分察姚中立稱准勅考試別  
頭進士明經等官考功員外郎高錡考試禮部闕送到

進士鄭齊之季景素兩人明經王淑等十八人並及第  
放榜之後羣議沸騰職當分察不敢緘默及得高錯狀  
伏以進士明經並先無格限其所送進士二人文藝並  
堪與及第明經比年所送不過三五人今年禮部開送  
十一人及考試帖義十一人並堪與及第勅鄭齊之季  
景素據所試比較常例得者不甚過差宜並與及第明  
經王淑等五人覆試帖義通數高並與及第餘落之  
武宗會昌四年二月權知貢舉左僕射判太常卿王起



下及第二十五人續奏五人堪放及第楊知至竇絨楊  
嚴鄭朴源重奉勅只放楊嚴及第餘並落下

五年二月左諫議大夫陳商知舉放進士二十八人覆  
落八人時以去年僕射王起知舉放二十五人續奏江  
陵節度使崔元式甥鄭朴東都留守牛僧儒女壻源重  
故相竇易直子絨監察御史楊收弟嚴勅遣戶部侍郎  
翰林學士白敏中覆試落下三人唯放楊嚴一人至是  
又遣敏中覆試落下八人議者以為公

宣宗大中元年正月禮部侍郎魏扶放及第二十三人續奏堪放及第三人封彥卿崔瑒鄭延林等皆以文藝為衆翰林學士戶部侍郎知制誥韋琮等考盡合程度其月二十三日奉進止並付所司放及第有司考試只合在公如涉徇私自刑典從今以後但依常例取舍不得別有奏聞

懿宗咸通十一年正月以吏部尚書蕭鄴吏部侍郎于德孫吏部侍郎楊知溫考官司勳員外郎李輝禮部員

外郎崔澹等考試應宏詞選人

十二年三月以吏部尚書蕭鄴吏部侍郎歸仁晦李當  
考官司勳郎中鄭紹業兵部員外郎陸勳等試宏詞選人  
十三年三月以吏部尚書蕭鄴吏部侍郎獨孤雲考官  
職方郎中趙蒙駕部員外郎李紹考試宏詞選人試日  
蕭鄴替差右丞孔溫裕權判

僖宗乾符四年正月以吏部尚書鄭從謹吏部侍郎孔  
晦吏部侍郎崔堯考宏詞選人

五年六月以吏部尚書鄭從諱吏部侍郎崔沆考宏詞  
選人

六年三月以吏部侍郎崔沆崔澹試宏詞選人駕部郎  
中盧蘊刑部郎中鄭頊為考官

晉高祖天福七年五月勅應諸色進策人等皆抱材能  
方來投獻宜加明試俾盡臧謀起今後應進策條中書  
奏覆勅下其進策人委門下省試策三道仍定上中下  
三等如是元進策內有施行者其所試策或上或中者

委門下省給與減選或出身優牒合格叅選日其試策  
上者委銓司超一資注擬其試策中者委銓司依資注  
擬如是所試策或上或中元進策條並不施行所試策  
下元進策條內有施行者其本官並仰量與恩賜發遣  
若或所試策下所進策條並不施行便仰曉示發遣不  
得再有投進餘並准前後勅文處分

周太祖廣順元年六月差翰林學士魚崇諒就樞密院  
引試進策人考定昇降聞奏

三年五月勅進策獻書人宜令翰林學士申文炳如樞  
密院引試定優劣聞奏

十一月乙卯命翰林學士竇儼試進策官曹巨源鄧杲  
李曉等於禁中策曰王者以禮御人倫以樂和天地以  
兵柔萬國以刑齊兆民四者何先殊途同治或因或革  
各適所宜故五帝殊時不相襲禮三王異世不相沿樂  
兵有務戰不戰之異刑有輕次重次之差歷朝張施繁  
不具引自唐祖混一區夏太宗嗣成聖功言其禮則三

正有常言其樂則七宗有秩兵息而臣道咸順刑措而  
民心不渝五帝三王不足尚也越自天寶之後國經混然  
禮樂湮墜而衆不知兵刑煩擾而下不畏朱梁晉漢皆  
用因仍洎我朝開創以來力務興振然薰歆燼滅歷年  
滋多焦思勞神觀效未著予欲父慈子孝兄弟恭君  
仁臣忠夫義婦聽聲明文物無其缺祝嘏辭說必有序  
萬儀咸秩百神受職家肥國肥知禮之尊也當用何理  
副茲虛懷予欲六律六品七政九變金石絲竹之器羽

蠹無所設施無城春鬼薪之役無三居五宅之流晝衣  
冠而人不犯虛囹圄而不入無刑之理何以致諸子大  
夫博議洽聞窮微覩興提筆既干於竒遇撞鍾必應於  
嘉音抱屈將伸直言勿隱既而以所對之詞上進乃授  
巨源及杲簿掾賜峽進士出身



冊府元龜卷六百四十四